

天岳山館文鈔

天岳山館文鈔目錄十三

平江李元度次青

雜著

雜著者以其無類可歸而名之也昌黎集以雜著居首諸家均有此目編次或前或後無關宏旨也

韓歐集中無一字及釋老文品特高蘇曾則不免矣而蘇尤甚近代惟刁庭望溪不蹈此病卽爲紹流作傳誌亦不用彼教中語潘次耕則以禪悅文入外集惲子居集中動及宗乘蓋結習未忘耳是集論輪迴論因果論魂魄有與二氏之言相入者然理實如此不能顧時俗之駭也抑考范文正有水陸齋薦祖先文文山有誕節保安等疏真文忠集中青詞朱表凡十數篇三公皆祀兩廡

者也况此等文尤非齎薦青詞比耶

地志家近人多以三志爲善本三志者康氏海武功志三卷用紙六十餘緡韓氏邦靖朝邑志二卷用紙十六七緡世爭推其高簡陸氏隴其靈壽志十卷世尤以其人重之余皆不以爲然嗣見章氏學誠書三志後嘆爲先得我心章氏謂三家皆不知史法因條舉其失而糾之洪稚存亦議其失趙味辛書武功志後挾摘爲尤當可見學有專家言不可以一端盡也余嘗襄事通志館兼輯縣志南嶽志與同人論體例及所擬例目因倣羅鄂州集中存新安志文例並過存之以備覽焉

原性

讀論語

讀論語二

讀論語三

讀論語四

讀大

學 孟子錯簡 四書次第 是非 氣機 輪迴 因果
魂魄 魂魄二 志疑 杜工部墓攷 平江縣重修 文廟
上梁文 重修南嶽廟殿上梁文 平江縣志例言十五則一
南嶽志小序 平江縣志論三十二則

天岳山館文鈔卷三十八

原性

孔孟言性未有離氣質而言者也。天命之理日流行於大化之中。人得之以爲性。旣爲人則必有所稟之氣。與所具之質。無氣質則無是人。無人則性將焉附。可見不落氣質不可謂性。言性便不能離氣質矣。然謂性不能離氣質則可謂本性。外別有氣質之性則不可。蓋天地之氣陰陽剛柔而已矣。而質卽因之。故凡稟氣之陽者其質必剛健。而其毗於陽而偏勝者則爲躁暴爲乖戾。稟氣之陰者其質必柔順。而其毗於陰而偏勝者則爲便佞爲詭隨。二者氣質之偏也。因其偏而遂各趨於所習。習於善則善。習於惡則惡。

孟子卷之二十一
故曰性相近也習相遠也若夫稟氣中和稟質純粹初無偏倚駁雜自能完其本然之善是謂上智氣稟昏濁加以物欲痼蔽其本然之善已漓雖強之習善而不可是謂下愚故又曰惟上智與下愚不移此孔子言性之定論也雖然人卽下愚卽甚相遠而其本善之真性固在也觀乍見孺子入井則皆有怵惕惻隱之心噉蹴而與之則行道與乞人皆不屑故能充無欲害人之心則皆可爲仁充無穿窬之心則皆可爲義此孟子所以有性善之說而以惻隱羞惡辭讓是非明四端以平旦之氣明好惡之相近與孔子之言不相倍而相足也孔子別其等孟子探其原其理本一卽韓子性有三品之說亦本諸孔子也宋儒因孟子之言以疑孔子意性

分三品則不得爲性善遂謂相近遠與不移者爲氣質之性而非性之本且謂若言其本性卽是理理無不善孟子言性善矣何相近之有信斯言也則人既有義理之性又有氣質之性是二性也一心而二性有是理乎夫性一而已人自形生神發而後天命之理既墮於氣質之中則自上智外必須變化克治乃可明善而復其初其下愚與相遠者正氣質累之也性善云者就氣質中指出義理耳氣質自氣質不得以性言孟子言耳目口鼻四肢之欲有命焉君子不謂性也是其明證然則氣質烏可言性哉且夫性在氣質之中與水在器中一也孟圓則水圓孟方則水方若孟有偏曲窳凸則水亦不能周且圓矣然周且圓之本性固在也且不周

不圖者亦卽此水也。烏可別白之曰是爲器之水哉。聖人之言萬理具足。豈有但言氣質之性不言義理之性者。不言本性而專言氣質之性。則性之本體昧矣。聖人不若是疏也。故知言性則已包氣質。不特遠近不移爲然。卽孟子道性善亦未嘗離氣質而專言義理也。若所云氣質之性。乃後儒所添設。夫豈孔孟之本指哉。朱子註孟子有云。氣質所稟雖有不善而不害性之本善。此論最明。程子張子均因相近相遠與不移有礙於孟子性善之說。故添出氣質之性一層。如朱子此註。則孔孟之說皆不倍矣。不
解註論語何以獨不用此說也。

讀論語

論語二十篇一言以蔽之曰仁而已矣。聖學以求仁爲宗。故時習而說。朋來而樂。不知而不愠。皆以全吾仁也。然仁莫先於孝弟。而巧令賊之。故次章卽並舉焉。凡夫子論孝。皆求仁之先務。而其論忠信篤敬。論剛毅木訥。論巧令。足恭爲可恥。皆去不仁之實功也。蓋夫子十五而志學。志此仁也。七十而從心不踰矩。熟此仁也。其與回言終日言仁道也。與曾子言一貫明仁體也。何者。道體物而不可遺。仁體事而無不在。仁者以天地萬物爲一體。故曰己欲立而立人。己欲達而達人。不仁者私間之耳。去私莫若行恕。夫子告子貢以一言終身。曾子告門人以忠恕而已。皆一貫之眞傳也。天

之實理曰誠聖人之實心曰仁誠者天之一貫仁者聖人之一貫
仁之外無所謂道仁之外亦無所謂聖也昔周子每令二程子尋
孔顏樂處所樂何事夫樂豈有他哉樂吾仁而已矣仁者不憂宜
其樂也是故子路言志車裘共敝而無憾求仁也顏子無伐無施
不違仁也夫子安之信之懷之安仁也學至安仁不違仁是謂反
身而誠樂莫大焉無怪疏水曲肱而樂簞瓢陋巷而亦樂也且夫
夫子曰天何言哉四時行焉百物生焉又曰知我者其天可謂窮
神而達化矣然而時之行非自行也物之生非自生也一元氣之
鼓動而已故曰大哉乾元萬物資始乃統天元者仁也資始而統
天者一貫也下學上達達此而已是故學不厭學仁也誨不倦誨

仁也不特誨顏子以克復誨仲弓以敬恕誨司馬牛以訥言誨子貢以能近取譬以事賢友仁誨樊遲以愛人以先難後獲以居處恭執事敬與人忠誨子張以恭寬信敏惠言仁至精且詳卽其與諸弟子言若寡尤悔若崇德修慝辨惑若修己以敬以及三畏九思三戒三益三愆諸訓無一非言仁也至若論政論禮樂論道國論爲邦總之不離乎仁者近是明德與新民其道一也所謂一以貫之也惟其以求仁爲主故不輕許人以仁由之果求之藝亦之志禮樂憲之狷介及子文之忠文子之清皆不許以仁獨以仁許夷齊許微箕比干而於竊位之文仲拒父之衛輒則深斥其不仁聖人之情不大可見哉故知聖學專在求仁斯論語二十篇一以

貫之矣。張子作西銘言乾父坤母民胞物與而推本於存心養性
斯爲得論語求仁之旨者夫。

讀論語二

學有頓漸二宗二者同歸而殊塗皆可入聖人之道各視其資性所近而已朱子繇漸入者也其學似曾子曾子隨事精察力行一旦豁然貫通遂悟一貫之旨朱子宗之若薛敬軒羅整庵胡敬齋陸稼亭諸儒皆宗朱者也陸子繇頓入者也其學似孟子孟子謂先立乎其大者則小者不能奪陸子宗之若陳白沙王陽明羅念庵孫夏峰諸儒皆宗陸者也是二宗者孔子實兼之其教則因人而施耳博文約禮下學上達之訓固以循序漸進爲正宗然謂聖門立教必主漸不主頓則又不然於何徵之卽於論語徵之子曰一日克己復禮天下歸仁焉以天下之歸仁決其幾於一日可謂

三才圖會卷之三
頓矣。然猶曰爲顏子言之也。乃又曰有能一日用其力於仁矣乎。我未見力不足者。又曰苟志於仁矣。無惡也。夫心之所至。力卽從焉。志之所之。惡卽絕焉。此非合凡學者言之乎。至其曰仁遠乎哉。我欲仁。斯仁至矣。則尤直截了當。蓋欲卽是仁。非欲外更有仁。欲卽是至。非欲外更有至。反觀自得。不待外求。此聖門之頓法也。其用之不同。則視其人之性質與其功候何如耳。繇漸之說。其流弊較尠。然非積數十年之功力。不能透悟。又其言心言性言命言理言氣者。至微且密。非士君子莫能喻也。惟聞孟子之言。則雖婦人小夫。一旦反求諸身。皆可以自得。而不失其本心。陸子之求心得。陽明之致良知。皆此義也。蓋世變愈下。則求道愈苦。其難聖賢之

思拯其陷溺也亦愈迫非得簡捷易行之宗悊難保不望道而生
畏也後人以頓悟爲禪學因而入主出奴是丹非素豈知證以聖
人之論固同出一源初非若水火冰炭之不相入哉然則欲泯朱
陸之異同卽論語求之可也

讀論語三

論語所言之義理精且粹矣。卽以文論。非諸經所能及也。易詩書禮春秋之文。各造其極。亦各不相謀。而俯括處終不及論語。論語之文。能以數語抵人千百言。如太和元氣。如化工之肖物。各無遁形。觀其論學。則曰志於道。據於德。依於仁。游於藝。曰興於詩。立於禮。成於樂。曰智不惑。仁不憂。勇不懼。曰修己以敬。曰先難後獲。曰一以貫之。曰君子不器。曰性相近。習相遠。曰上知下愚不移。曰欲立立人。欲達達人。論政。則曰富之。教之。曰先之勞之。無倦。曰足食足兵。民信。曰君君臣臣父父子子。曰近悅遠來。曰無倦以忠。論孝。則曰無違。論志。則曰安之。信之。懷之。論事。則曰以約鮮失。曰有教

無類曰德不孤必有鄰曰道不同不爲相謀曰辭達而已矣曰勿欺也而犯之曰不踐迹亦不入於室凡此類人累千百言所不能達者獨以一二語括之不漏不溢不待注釋而解此諸經所不及也至其鍊字之精確能以一字概其人之生平盡其事之曲折而又若不經意而出之如果也達也藝也愚也魯也辟也諺也譎也正也則舉一字如見其入矣又如罔也殆也適也莫也勞也憇也亂也絞也愚也蕩也賊也狂也肆也康也忿戾也直也詐也憤也悱也野也史也則舉一字如目擊其狀矣若其善爲形似則有若翕如純如皦如繹如勃如蹕如稽如翼如申申如天天如闐闐如行行如侃侃如恂恂如與與如怡怡如愉愉如蹶蹶如切切偲偲

如體物之妙不可思議其善於形容則如子溫而厲威而不猛恭而安如子路有聞未之能行唯恐有聞如仰之彌高鑽之彌堅瞻之在前忽焉在後皆使人閉目自思而得之其善於折辨則曰何以報德曰未能事人焉能事鬼未知生焉知死曰獲罪於天無所禱也曰再斯可矣曰今女畫曰過猶不及曰爾所不知人其舍諸皆不煩言而自解卽如何以報德四字耳若在孟子必大放厥辭而義始盡也能如是之簡要乎更有無起無訖奇肆不可方物者如不曰如之何如之何者吾未如之何也已矣觚不觚觚哉觚哉禮云禮云玉帛云乎哉樂云樂云鐘鼓云乎哉一二語中有無限波折無限感慨奇文也又如太師摯適齊柳下惠爲士師周公謂

魯公周有八士邦君之妻等章皆前無所承後無所注使人自得其意於言外非古今至文爲六經所未嘗有者耶夫曾子少孔子四十六歲論語記曾子之卒則去孔子將百年矣而記者之文若此齊魯之文學真迥絕千古哉昔人謂讀論語始覺孟子之繁且較費力讀孟子又覺諸子之尤費力此時會爲之也天下有道則辭無枝葉然則學文者壹以論語爲宗可也

論語季氏將伐顓臾章凡二百七十四言文氣博辨已開孟子之先又子言皆稱孔子曰洪氏興祖謂此篇爲齊論語非無見也此外若宰我問三年之喪章凡百三十九言長沮桀溺章百四十一言子路遇丈人章百三十四言堯曰章百五十二言子

張問政章百九十一言皆不似諸篇之簡括且與孟子爲近意者其皆齊論歟

讀論語四

後世史家列隱逸傳。嵇康皇甫謐皆作高士傳。凡不爲世用而隱者皆錄之。甚有裨於風教。而其義例實自論語開之也。論語記聖賢之言論出處備矣。而逸民章獨彙舉伯夷叔齊虞仲夷逸。朱張柳下惠少連各爲論次。與合傳贊無異。其記儀封人農門荷蕢楚狂接輿長沮桀溺丈人則各詳其問答。夫封人一見卽知子爲萬世師。農門以子爲知其不可而爲之。不可謂非知己也。荷蕢聞磬聲而知子心接輿以鳳比孔子而憂從政之殆。蓋預知子西用白公之必致亂也。沮溺丈人辭雖倨而意則殷。七人者皆非常人也。乃其姓氏皆軼不傳。其高風逸韻猶幸於論語中彷彿遇之。向使

七人不與夫子接則皆不傳矣然則夫子轍跡未到之處似此者豈更無人而其堙滅而不稱者可勝道哉不但已也太師摯等適齊適楚適蔡適秦入河入漢入海皆因桓子受女樂孔子行遂相顧而起也自非見諸論語誰復知其潔身去位之高耶烏虜唐虞有巢父許由夏之時有卞隨務光由光義至高而文辭不少樂見無傳之者也三代下若諸葛隱南陽所師者龐德公司馬德操所友者徐元直崔州平孟公威石廣元皆天下奇士也六人者幸以諸葛故其名猶在後世然事績無考仍在若滅若沒閒使諸葛亦不顯則六人皆泯滅無稱矣世豈知有如此人哉以南陽咫尺地其人才若此况孔子周流十二國其所遇非常之士不宜其多乎

哉。世常說天下無人。非無人也。有其人而世無知者也。繇是觀之。凡浮沈里閭。混混與世相逐者。皆不可以淺近量也。惜後世史家傳隱逸者。無此識耳。吾蓋讀論語而深有味乎史遷之言也。閭巷之人。欲砥行立名。非附青雲之士。惡能聲施於後世哉。

讀大學

人知子思作中庸不知大學亦子思作也漢賈逵曰孔伋窮於宋懼先聖之學不明而帝王之道墜故作大學以經之中庸以緯之鄭康成禮注及孔叢子並云大學中庸皆子思作惜後儒無申其說者程子以大學爲孔氏遺書朱子則謂首章爲孔子之言曾子述之其下十章乃曾子之意而門人記之夫曾子之門人孰有賢於子思者曾子得一貫之傳使門人作大學以明聖道豈有舍子思而他屬者是賈氏說正與程朱合也第朱子分爲經傳不能無疑蓋易之象象經也繫辭傳也春秋經也左氏公穀傳也皆各自爲篇者也從未有一篇之中兩人分撰經傳而以首章爲經後數

章爲傳者。惟知爲子思一人所作。則可以無疑。蓋其書首末相應。實非兩人之辭。而其中復引曾子之言。則非曾子所自作明矣。微子思誰其作之哉。抑又思曾子聞一貫之道。門人問曰。何謂也。曾子以忠恕示之。門人中縱不止一子思。然子思必在其中。是一貫之傳。傳曾子卽傳子思矣。惟子思深得忠恕之傳。故其作大學言治平必本於藏身之恕。而又以所惡於上下前後左右者。明絜矩之道。絜矩卽忠恕也。及其作中庸。則曰忠恕違道不遠。又特歸重於恕。曰施諸己而不願。亦勿施於人。又以所求乎子臣弟友而未。能者。明恕字之義。蓋忠恕本一理。惟其爲一理。故曰一以貫之。然則大學與中庸皆發明一貫之道。其出子思一手無疑也。不審惟

是子貢問終身行之夫子既告以恕及其問仁又以能近取譬勸之子貢久而有得乃曰吾亦欲無加諸人故卒聞一貫之學論者謂曾子從行入子貢從知入夫聖學知行合一未有知不本於行者况明曰終身行之乎夫一言可以終身行是卽一貫之道也孟子子思之門人也其言曰反身而誠忠恕也又曰強恕而行求仁莫近焉其歸重恕字與大學中庸之訓若合符節則仍發明一貫之道也聖門之學莫切於求仁而求仁必自恕始孔子傳之曾子曾子傳之子思子思傳之孟子無二道也然則賈逵所謂作大學以經之中庸以緯之殆塙不可易也

又案程子曰論語之書成於有子曾子之門人故二子獨以子

稱柳子厚則曰曾參少孔子四十六歲是書記曾子之死則去孔子也遠矣曾子死孔子弟子略無存者矣吾意曾子弟子之爲之也或曰孔子弟子雜記其言卒成其書者曾氏之徒也據此則論語亦子思所作縱不必盡出子思之手亦必其所裁定也然則論語大學中庸皆成於子思述聖之爲功於萬世大矣哉

孟子錯簡

孟子萬章問交際章康誥曰殺越人于貨閔不畏死凡民罔不讞是不待教而誅者也殷受夏周受殷所不辭也於今爲烈如之何其受之朱子云殷受至爲烈十四字語意不倫李氏謂此必有斷簡或闕文愚意其直爲衍字耳然不可考姑闕之可也余少讀而疑之後讀彭更問曰章至孟子曰非其道則一簞食不可受於人如其道則舜受堯之天下不以爲泰因恍然大悟殷受夏周受殷所不辭也於今爲烈十四字當接於此下繼之曰子以爲泰乎語意圓足四受字一氣相承而歷舉唐虞夏殷周二帝三王事理正自一貫其交際章則刪此十四字於是不待教而誅者也下直接

如之何其受之語氣始覺明淨其爲錯簡無疑恨不起朱子而質之也顧或以移置經文爲非則有程子移誠不以富亦祇以異二句於齊景公章及朱子考定大學經文之例在

集註謂此章文義多不可曉不必強爲之說亦止因殷受夏十四字爲梗耳移置彭更章則無不可曉矣

四書次第

論語孔子之行述語錄也其學術性情動靜語默盡在二十篇中凡聖言之見於諸子百家者皆不若論語之粹無論語則無孔子矣大學中庸本戴記中之二篇朱子作章句合論孟爲四書其說大學以經爲孔子之言而曾子述之傳則曾子之意而門人記之是曾子之書也中庸則孔子孫子思所作漢賈逵謂大學亦子思作則又曾子之門人矣乃朱子訂四書先之以大學次中庸次論孟凡選錄四書文者並依其序則先後頗爲失倫大學雖初學入德之門然其精粹不能過論語孔子之道曾子得其傳子思又受學於曾子今各以其所述先論語可乎夫道有主者有傳者孔子

傳之曾子曾子傳之子思子思傳之孟子其源流可考也謂宜以
論語爲首大學次之中庸次之孟子又次之於義乃安余說四書
必兢兢於此不敢以是爲細故而忽之也

是非

是非有定者也。此是則彼非，無兩可也。抑有不盡然者，往往兩是焉而並行不悖。甚則相反而適以相成。若水之與火，冬之與夏，相懸若天淵矣。然水火缺一不能成，既濟無秋冬則不能爲春夏。惡能執此以廢彼哉？莊生云：此亦一是非，彼亦一是非。然則欲是非之不謬，非折衷聖人不可也。雖然，聖人亦有不能不兩存者。湯武革命，順天而應人，聖人之言也。然武王伐紂，夷齊獨恥食周粟，至餓於首陽以死。夫夷齊者，窮天地互萬世非之而不顧者也。夷齊是則武周非，武周是則夷齊非矣。然武周不失爲聖，夷齊不失爲賢。孟子且推之爲聖，豈非世固有兩可之理耶？嘗夷齊叩馬時，

左右欲兵之太公曰此義人也扶而去之夫太公旣以夷齊爲義則伐紂爲不義矣而卒不聞止其伐者豈甘爲不義哉亦謂世固有兩可之義也至若伯夷之清伊尹之任伯夷之隘柳下惠之不恭皆正相反而皆不失爲聖賢又惡能執此以廢彼哉不甯惟是卽以大經論同一易也而施孟梁邱諸家所解各別一詩也而齊魯韓毛諸家所解各別一春秋也而左公穀嚴何諸家所解各別世皆並存其說而皆有益於經自非仲尼復生惡能定一是而辨眾非乎烏虜此大智之舜所繇執其兩端而後能用其中於民也兩端者彼此不齊之極致正水火冬夏之謂也惟平心察之而權度以取中斯真是出矣自古明君哲相聽言用人皆得此意而獨

至於論學術則世之號稱儒者率是己非人未得程朱之所以是亦未深悉陸王之所以非但排擊異己以漸自附於正學之林烏虜彼其所謂是者果是而無一非耶所謂非者果非而無一是耶抑程朱之是非果卽孔孟之所謂是非者耶抑猶有幾微未盡協者耶然則其斷斷交爭也不過各是其所是各非其所非而已而猥曰吾以衛道直謂之專己自足可也

氣機

氣機者動於不自知者也。大而世運之升降，國家之興亡，小而事功之成敗，忠質文之循環，君子小人之消長，恆必繇之繇細而鉅，繇微而彰，繇陂而平，繇晦而顯，皆可於氣機決之。其將行也，雖聖人不能使之不行；將廢也，雖聖人不能使之不廢。明者能見於事前，必待事至而後知之晚矣。昔者夏后氏之世，有窮竄位，少康止一戎一旅，至微弱也，而得氣正大，已伏中興之機。商王小乙時，周太王已肇王迹，越二百餘年，始代商，而當時早有寢昌寢熾之勢。秦之先最微，襄公始列於諸侯，然甫得西陲，卽僭郊祀，祀上帝，代周之機見於此矣。其後望氣者知東南有天子氣，始皇遊會稽以

厭之項籍曰彼可取而代也漢高祖遊咸陽縱觀秦皇帝歎曰大丈夫當如此矣光武帝素謹厚亦曰何繇知非僕三人皆匹夫而其言若此此非氣機之先見者乎田氏竄齊三卿竄晉春秋將爲戰國之機也而田當卜娶時已有與之莫京之兆晏嬰告叔向更決其必將代齊魏畢萬始爲大夫卜偃決其必大季札使晉則知晉政必萃於三家後世若丕之竄漢炎之竄魏裕之竄晉道成之竄宋衍之竄齊霸先之竄梁以及溫竄唐知遠竄晉威竄漢皆各有不能中止之勢則氣機所爲而勢卽因之也東漢之節義盛矣而自嚴光拜諫議不屈已啟其機後激而成黨錮陳寔蓋早知之故弔張讓以紓其禍季漢羣雄俶擾天下幾無主矣而武侯在隆

中已預定三分之局。晉以清談貽禍。山濤見王衍卽知其必誤。爲生宋以新法致亂。王安石自命不凡。蘇洵已有辨姦之論。此非識機者之能早辨耶。唐亡於女禍及藩鎮。武韋之禍烈矣。而機已啟於太宗。納巢刺王妃之日。泚希烈懷光之禍烈矣。而機已啟於肅宗。許侯希逸畱後之日。宋之興也。陳搏聞而喜曰。天下自此定矣。及其衰也。邵雍聞天津橋杜鵑卽預憂之。終宋世武功不競。受制於遼金。然自杯酒釋兵權。不能乘勢滅西夏。復燕雲。其機已決於此。凡此皆氣機所發露也。若夫井田學校。封建諸大政。其行也以漸其廢也。亦以漸。人知商鞅開阡陌。不知齊之軌里連鄉。晉之爰田。魯之稅畝。鄭子駟之爲田洫。已有壞井田之機。至孟子告滕文

時貢助徹法已不可考人知始皇焚書不知諸侯惡其害己已皆去其籍人知秦廢封建不知黃帝時萬國湯時三千餘國武王時千七百七十二國久已互相吞併特至始皇時其氣機萬不可遏勢不至一掃而空之不止耳晉之平吳隋之平陳宋平南唐諸國勢如破竹皆迎機而進者也然此猶其大者也韓信以匹夫葬母令冢旁可容萬家陳平分社肉卽以宰天下自負于公一獄吏令高大門閭使可容駟馬王祐植三槐知子孫必爲三公凡此類亦機之先見者耳又凡一代風氣當其極盛必有主之者而機兆初萌早有人預導其先路卽如四子書定自程朱然晉戴氏有中庸傳梁武有中庸講疏唐李翱有中庸說宋仁宗書大學賜王拱宸

是二書早已單行文至八代之衰敝極當起而韓柳未出以前北周已有蘇綽能返詔詰於尙書至元結獨孤及遂先變六朝之體宋歐蘇未出以前已有柳開穆修以韓柳之文倡天下非所謂有開必先者歟他若漢學宋學家之互爲勝負義理考据詞章家之迭爲興廢以及質文奢儉盛衰苦樂之循環莫不各有氣機以主之譬諸寒暑迭乘不能一日驟寒驟暑也各有其積漸以馴至於寒暑之極坤言履霜堅冰至復言碩果不食皆此義也至兵事尤視氣機凡料勝敗如神者皆於氣機決之也是故聖人知幾達人審幾君子見幾非靜者莫能見微而知著

輪迴

輪迴之說儒者所不言然理實不可易天地萬物皆在輪迴中何獨疑於人哉今夫日生於東沒於西且復從東出此日之輪迴也今夫月繇朔望而弦而晦而復生魄生明此月之輪迴也今夫雨下爲水雲上於天復爲雨龍汲水亦爲雨此雨之輪迴也繇是推之自春夏而秋冬冬復爲春爲天時之輪迴自元亨而利貞貞下復起元爲天命之輪迴繇暑而寒而大寒寒復爲暑爲氣候之輪迴繇治而亂而大亂亂復反爲治爲世運之輪迴他若薪盡火傳薪有窮時火傳無盡是火之輪迴也水發於西而注於東入海以後仍復西還蓋諸水泉脈皆與海通故海受眾流終古不溢非果

有尾闾沃焦之洩是水之輪迴也春生夏長秋萎冬枯及春而復生是草木之輪迴也春耕夏耘秋收冬藏及春夏復耕且耘是百穀之輪迴也人周身營衛自踵至頂復自頂至踵日行三百六十度是血氣之輪迴也田鼠化鴛雀化蛤雉化蜃鳩化爲鷹鷹復化爲鳩是物類之輪迴也高岸爲谷深谷爲陵滄海變桑田桑田復變滄海以元會運世之說推之是天地之輪迴也人生天地間萬物之一耳然則繇生而長而壯而老而死死而又生固其常也何足訝哉且夫言輪迴不自二氏始也易象陰陽九六老變爲少正輪迴之實禹曰生寄也死歸也歸必有其所則寄必有自來矣詩曰惟嶽降神生甫及申明言神降而爲人也推之蕭何應昴宿傳

說爲列星來去益彰彰矣。蘇子曰：其生也有自來，其逝也有所爲。幽則爲鬼神，而明則復爲人，此理之常，無是怪者。烏虖！此皆儒者之言也。世之陋儒，自附闢佛老，必從而非之，信斯言也，則人死必泯然無知，且泯然同盡而後可。古聖人曷爲有廟饗之禮乎？若謂不泯滅亦不輪迴，則自開闢以來，死者不止恆河沙數，將何地以容之？昔者孔子之繫易也，曰：仰以觀於天文，俯以察於地理，是故知幽明之故。然則觀日月雨水及滄桑陵谷之有輪迴，而幽明之故可知也。曰：原始反終，故知死生之說。夫終而曰反，則死必有所歸。始而曰原，則生必有所自，可知也。曰：精氣爲物，游魂爲變，是故知鬼神之情狀。夫既能爲物變，則出入往來自不出陰陽之外。既

有情狀則非一死卽漸滅以盡可知也。然則人之死爲鬼鬼之生復爲人正猶寒暑晝夜之遞禰於前無二理也。人蓋日在輪迴中而不悟耳。或曰聖人何以不言曰觀繫辭則聖人未嘗不言也。人自不察耳。且聖人重人事但使人各盡其道於五倫五事中固不必索諸生前生後也。蓋知死卽在知生中事鬼神卽在事人中民可使由之不可使知之也不寧惟是卽造物者亦但使人各盡所當爲而已曷嘗使之悉悟所從來哉。然其理固塙不可易也。

因果

因果之說本於聖經賢傳不自道釋始也易言餘慶餘殃書言惠吉逆凶惟影響又言作善降百祥不善降百殃又言皇天無親惟德是輔詩言永言配命自求多福左氏言禍福無門惟人自召論語言羿稷不得其死禹稷有天下孟子言仁則榮不仁則辱禍福無不自己求之凡此皆因果之炳著者也人生一飲一啄莫非前定所謂果也命之不易者也而其所以致此則因也命之所從來也聖賢言義理鬼神言吉凶然言義理而吉凶在其中矣言吉凶而因果在其中矣言吉凶之因果而義理在其中矣聖人知善者必吉惡者必凶猶夏之必暑冬之必寒而世人不知也於是諄諄

然教以爲善去惡教以趨吉避凶所以救其焚而拯其溺故曰吉凶與民同患而世人不信也則且以神道設教而因果之說著焉若夫道家以清靜無爲爲宗釋家以了生死爲宗彼方遺棄一切若吉凶禍福殃祥何足關其慮哉故因果實儒家之言釋氏至末流始暢言因果然其說晚出後六經且二千年不察其繇來猥以因果爲二氏之言而擯之可乎且夫天之愛人甚矣人之求富貴壽考安樂者情也均是人也何以此富而彼貧此貴而彼賤此壽而彼夭此安樂而彼困苦然且富貴壽考安樂者少貧賤夭折困苦者多造物之不公平不平甚矣不公平是不仁也且以天之權力何難生善人而不生惡人爲治世而不爲亂世而卒也善惡並

生治亂相倚豈天心果不仁哉彼各有所以致此之故造物無如因果何也孟子曰莫之爲而爲者天也莫之致而至者命也言天命似不言因果矣然莫之爲而固已爲之莫之致而固已至之豈漫然哉爲之至之者果也所以爲所以致者因也因果正天與命之所以然也人惟不明因果之理於是怨天之說起詩曰何辜于天視天夢夢又曰昊天不平昊天不惠而屈原至作天問以抒其怨懟莊周曰人之小人天之君子又曰竊鉤者誅竊國者侯司馬遷曰儻所謂天道是邪非邪柳宗元曰天道有功禍而無賞罰是皆以天爲不仁而無知也天之有禍福猶國家之有賞罰賞罰無定準則不能爲國曾是臨下有赫之天獨漫無綱維主宰悉聽人

之自爲而自致。邪世之號稱儒者，明知其理不可違，其事亦眾著，不可掩，但以其言近二氏而擯之，抑思語神怪之失，視怨天之失，果孰輕而孰重邪？況因果之說，悉本聖賢之義理，并不自二氏始。邪雖然，因果有定而無定者也。今日之果，本乎前日之因，有定者也。自天爲之也。今日之因，又爲後日之果，無定者也。自我爲之也。人定可以勝天，聖賢所以有立命之學，有造命之權。然則學者正宜盡人事以合天命，是故知因果而後可以知天，知天而後能畏天，事天奉天而不敢有一念之怨天。

魂魄

傳曰人生始化曰魄既生魄陽曰魂魄猶月之體魂則其光也魄者形也魂者神也形神合則生形神離則死故人死則魂升於天魄降於地也人秉陰陽之氣以生得氣之陽者魂得氣之陰者魄是故魂清而魄濁魂靈而魄蠢魂善而魄惡魂屬氣而魄屬血魂屬性而魄屬質也凡秉氣之清而智慧慈祥者魂勝魄也爲鬼爲神爲仙爲佛皆魂爲之秉氣之濁而愚頑暴戾者魄勝魂也爲惡爲逆爲孽爲殃皆魄爲之仁義禮智信道心也後儒所謂義理之性也魂之毗乎陽者也口之於味目之於色耳之於聲鼻之於臭四肢之於安佚人心也後儒所謂氣質之性也魄之毗乎陰者也

天不能有陽而無陰人不能有氣而無血有性而無質故魂與魄
合乃爲人而其爲上智爲下愚爲性近習遠之中人卽於是乎判
焉然而天之道扶陽而抑陰聖人之學亦扶陽而抑陰曰三戒曰
九思曰三畏曰克己復禮曰懲忿窒慾皆所以扶陽抑陰而制此
魄也天下不能有君子而無小人聖人能使小人聽命於君子而
天下治矣人不能有道心而無人心聖人能使人心聽命於道心
而吾心治矣然不可謂心本無欲也亦不可謂欲盡可去也何者
血肉之軀有魂又有魄故聖人之飲食男女與人同也而同之中
有大不同者則以其存理以節欲盡性而踐形也中人以下理欲
交戰於中則魂與魄迭相爲勝若夫大奸大惡人欲橫決而無所

不爲則純爲魄所用。違禽獸不遠矣。抑繇天視其魄。天奪其魄。故
適以速其死亡焉。佛氏淨六塵去六賊。皆所以制魄也。仙家修煉
使純陽之氣上昇。則必盡化其魄而後可。故有一毫之陰氣未盡
不能仙。有一毫之陽氣未散亦不能死。則皆魂魄爲之也。知魂魄
之說。則知踐形所以盡性。而氣質必宜變化矣。

魂魄二

魂爲陽爲清爲明魄爲陰爲濁爲闇至人養魂眾人養魄養魂則陽息而陰消如朔後之月明日長而闇日微養魄則陰息而陽消如望後之月闇日甚而明日蝕是故潛嗜慾省思慮所以養魂也恣情欲逞意氣所以養魄也養魂者鍊魄以歸魂死則魂挾魄而上升養魄者汨魂以就魄死則魄挾魂而下墜孟子曰養其大者爲大人養其小者爲小人卽養魂養魄之義也蓋人之生也魄先成而魂附焉其死也魂先去而魄從焉魂魄之合而成人猶夫婦之合而成家夫婦相得爲嘉偶不相得爲怨偶嘉則合怨則睽自然之理也是故魄能安魂則魂依於魄而長存魄不能安魂則魂

去其魄而速盡凡癡札天傷者皆魄不和魂厭而離之者也所謂魂升而魄降者魂非能乘雲升天也其靈能揚能浮可以歆享祀可以入輪迴變化無方故曰遊魂爲變魄非卽沈冥水土也其靈常依冢藏骨朽則反於無歸根而不復命故曰精氣爲物物卽魄也息者魂魄之交也息屬而魂魄合息絕而魂魄解老子所謂谷神是也眾人任息真人定息任息者聽其絕續爲生死定息者綿綿若存能養其出入而操絕續之權使魂強而魄弱心勝而氣微也然而舊魂得新魄可以復生道家所以有奪舍之術也死魄得生氣亦可以復生元女所以有鍊尸之法也或問魂魄於何覩之曰覩之以形貌凡魂魄靈者其貌秀魂魄強者其貌勁魂魄正者

其貌端而其眸子必瞭魂魄蹇者其貌澀魂魄弱者其貌萎魂魄
邪者其貌偷而其眸子必眊是故因有形可以徵無形

志疑

宋史周子倅南安程大中公珦命其二子受學於周子程子亦云
自再見周茂叔吟風弄月而歸有吾與點也之意又云昔受學於
周茂叔每令尋孔顏樂處所樂何事其得力於周子深矣乃伊川
作明道行狀則曰聞汝南周茂叔論道慨然有求道之志未知其
要汎濫於諸家出入於老佛者幾十年反求諸六經而後得之其
經筵奏劄亦云竊以聖人之道不傳久矣臣兄弟幸得之於遺經
然則二程之學於周子無與也朱子解太極圖說謂周子手是圖
以授程子可謂要矣乃伊川又曰未知其要其所謂要者果何在
耶然且汎濫諸家出入老佛直待反求六經而後得之豈二程不

以通書太極爲然耶夫仲尼師項橐學禮老聃問官鄒子師不必
賢於弟子也然周子不假師授默契道原則正得不傳之秘於遺
經者二程經其指授其於道也事半而功倍矣何復汎濫諸家出
入於老佛耶傳稱明道少好獵及學於周子自謂無此好周子曰
未也特潛伏而未動耳後十年果見獵而心喜然則周子之鞭辟
程子可謂洞見表裏矣胡竟亡其所自耶南軒與朱子書謂程先
生與門人講論未嘗一言及太極圖朱子謂此書詳於性命之原
略於進修之目未可驟語人此可爲程子解矣顧太極圖說及通
書與易相表裏者也程子作易傳正宜表師說以教萬世何竟無
一語及之明道與伊川同入成都聞緹桶者說易各渙然有所省

後伊川著易傳則曰斯義聞之成都隱者其引胡安定之說亦必明著之不沒人善若此此所以爲程子也乃安定有言則引之籀桶者有言則引之獨不及其師說不可解矣抑考朱子表章通書太極圖說可謂至矣朱子學程子者也朱子所見是則程子非矣程子所見是則朱子非矣且朱子與陸子論無極太極之旨往復爭辯其書有曰周子灼見道體又曰此老真得千聖以來不傳之秘厥論遽矣至其序大學則獨以二程接孟子之傳而周子不與焉序中庸則謂程夫子兄弟者出得有所考以續夫千載不傳之緒又謂微程夫子則亦莫能因其語而得其心夫宇宙間止有此道在易曰太極在論語曰仁在大學曰明德在中庸曰中其義一

也論太極既推周子得千聖不傳之秘序大學中庸又止推二程
續千載不傳之緒不又深可疑乎如謂程子之學或邃於周子然
周創而程因周爲其難程爲其易胡安定問顏子所好何學程子
著論悉本太極圖說其得力不可誣也三代下味遺經而承絕學
者其能遺周子哉願以質天下後世之知程朱者

杜工部墓攷

杜文貞公生唐睿宗先天元年壬子至大厯三年正月去夔州三月至江陵冬杪之岳州四年正月自岳之潭州未幾入衡州夏回潭州五年春在潭州四月避臧玠亂入衡州欲如郴州依舅氏崔偉因至耒陽泊方田驛秋扁舟下荆楚竟以寓卒年五十九旅殯岳陽此平江縣南三十里小田所繇有杜墓也公在耒陽時阻水旬餘聶令嘗致酒肉公酬以詩新舊唐書遂云遊嶽祠阻水縣令具舟迎之陷牛肉白酒一夕卒此史之誣也宋黃伯思辨之矣黃氏鶴則謂公酬聶令詩其題云詩以代懷興盡本韻又云陸路去方田驛四十里舟行一日時屬江漲泊於方田若果以飢死豈能

爲此長篇且畱宿驛亭乎况元稹誌公墓在唐史前無此說也今按唐書本傳之誤如公以開元末應進士不第誤書天寶初公獻賦在天寶十載誤書十三載公謁肅宗於鳳翔誤書彭原公以廣德二年依嚴武誤書上元嚴武鎮蜀時梓州刺史章彝已入覲誤書武欲殺公及彝其母奔救乃獨殺彝此類不可枚舉至公卒於大曆五年誤書永泰二年則年次尙訛地之訛更不足怪矣雖然史誤亦有因其說出明皇雜錄而劉斧摭遺又謂子美客耒陽過江上洲中醉宿酒家是夕江水暴漲子美爲驚湍飄泛其尸不知落何處元宗還南內思子美詔求之縣令乃積空土於江上曰子美爲白酒牛炙脹飢而死葬此矣由是耒陽縣北二里韓洲有公

墓記公祠者遂謂公尸漂沒僅得遺韓痊之而韓昌黎杜墳詩亦有寒骨一夜沈秋水及一堆空土煙蕪裏之句皆傳訛也今按公酬聶令詩後又有迴棹詩過洞庭詩蓋自耒陽歸潭岳也有登舟將適漢陽詩有暮秋將歸秦畱別湖南幕府親友詩所云北歸衝雨雪蓋秋末冬初時也有長沙送李十一詩所云與子避地西康州洞庭相逢十二秋西康卽同谷公以乾元二年寓同谷至大歷五年爲十二秋此又自衡歸潭之證也有風疾舟中伏枕書懷呈湖南親友詩此絕筆也所云歲陰冬炎公蓋卒於是年冬矣至云十暑岷山葛三霜楚戶砧則公以大歷三年來湖南至五年適三霜也安得誣爲是年夏已卒耒陽葬韓洲乎宋呂氏大防作杜詩

譜謂夏遷襄漢卒於岳陽唐詩紀事亦謂公卒於岳陽魯氏嘗作
年譜王氏得臣塵史並謂公卒當在潭岳之交秋冬之際吾平正
潭岳之交也平爲岳陽屬縣唐曰昌江治在中縣坪繇洞庭汭流
一舟可達小田距昌江治十里公殆卒於舟而渴葬於此歟元誌
稱扁舟下荆楚閒竟以寓卒旅殯岳陽岳屬別無杜墓遺蹟在小
田無疑誌又稱子宗武病不克葬歿命其子嗣業子美歿後餘四
十年嗣業乃啟柩襄祔事於偃師首陽山途次於荆拜余爲誌然
則公柩權厝小田已四十餘年矣卽歸祔偃師而詩王遺蛻攢瘞
汨江魂魄安此已久較韓洲之附會已大不侔况大厯元和間干
戈梗道或誌具而殯不果歸亦意中事也且公之子孫因流寓家

於平今小田有杜家洞公裔猶存其家藏至德三載授公爲左拾遺勅及宋紹興二十三年授杜邦傑爲承節郎勅明參政陳璿僉事張景賢並爲之跋錢氏謙益亦謂今岳州平江縣民杜富家猶藏拾遺勅不尤信而有徵哉若溪漁隱曰襄陽岳陽俱無杜墓惟耒陽有大抵名賢所在人各引以爲重其實耒陽自葬子美之遺韓而嗣業所歸元稹所誌自在鞏縣也是說也繇不知岳屬固自有杜墓耳夫鞏洲僞墓尙見寰宇記自昌黎外若宋之韓持國五代羅昭諫明之陳白沙諸公並有題詠而一統志且曰觀韓愈諸詩似柩雖遷而冢未嘗毀也今小田之杜墓幾無有知之者豈一人之遺蹟顯晦各不同歟同治癸酉九月余與麻邑侯維緒陳學

博之紀張提刑岳齡同訪公墓於小田馬鬣固無恙也因爲之攷以質能讀杜詩者

案塵史又云陽翟徐秀才出其父屯田君詩示予有古人風其過杜工部墳云水與汨羅接天心深有存遠移工部死來伴大魂流落同千古風騷共一源江山不受弔寒日下西原據此則工部墳宋時猶在平江也

平江重修 文廟上梁文

伏以

教垂萬世繼堯舜禹湯文武作之師祀遍九垓與天地日月鬼神
合其德浥文瀾於洙泗共瞻數仞之宮牆新禮殿於昌羅重樹千
尋之梁棟欽惟

聖廟宜極尊宗屬在是邦未閤體制今際

國家景運正重道以崇儒謹據士庶微忱爰鼎新而革故廟成翼
翼頌奏巍巍騰二十八宿之祥輝舉二百餘年之闕典輦飛鳥革
日吉辰良敬上虹梁敢申鮓祝效美奐美侖之頌禱作希賢希聖
之階梯

拋梁東日升滄海曉霞紅天岳峯前雲五色祥光飛繞

聖人宮

拋梁西鳳山百尺接丹梯試看嚙階鳴

盛世梧桐朝日萃萋萋

拋梁南道南奧旨昔儒探洛閭緒衍宋君子理學遺編好共參

拋梁北

聖教猶如星共極宮牆數仞得其門便許升堂兼入室

拋梁上彩筆干霄動星象白虹化玉自天來一道文光騰萬丈
拋梁下玉振金聲宣教化泮池水長墨龍飛萬古江河流日夜

伏願

聖學昌明·人文蔚起·博厚高明·悠久配幬·載以無疆·道德經濟·文
章產英·賢而未艾·璧宮泮水·諸生習禮·其閒聖域·賢關君子·能由
是路·天上應三台之宿·名世挺生·日邊書五色之雲·魏科疊擢·龍
蹕啟運·欣逢黃道之開·虎拜揚休·定副丹忱之祝·

天岳山館文鈔卷三十九

平江縣志例言

志者史之一體。周官小史掌邦國之志。今國史一統志是也。外史掌四方之志。今直省通志及府州縣志是也。三代上如周志。鄒魯之屬。其亡久矣。班氏固因史記八書爲十志。地理居其一。范蔚宗改名郡國。實與地理無殊。而郡國書稱志。則自晉常璩華陽國志始也。古方志之存者。若唐元和郡縣志。宋元豐九域志。皆專志地理。樂史太平寰宇記。乃及人物藝文。蓋至是而紀錄始詳。體例亦大變焉。自後踵事日增。凡天文五行食貨職官選舉之屬。莫不具備。是志也而兼全史矣。史專紀一代。志則上下數千年。別部分

夫岳山館文鈔

卷三十九

雜著

一

門貫串該括是志也。且兼通史矣。顧用其實不必襲其名。近世作者矯蹈常襲故之弊。多易名目。以矜古雅。曰紀曰典曰書曰錄曰略曰攷曰傳曰記。於正史之外。并別史雜史之體。莫不兼之名。與實殊不相應。陸氏隴其志靈壽。改府志之表紀志傳。統謂之志。儒者之審於義法也。抑考古之志郡邑者。若宋之澈水志。元之齊乘。明之朝邑武功志。皆以簡要取貴於世。視俗本蕪濫者。自爲傑出。然其於古今事變。政典興革。民生吏治。利病得失之所關。不免疏略。經世者其奚賴焉。近世通儒若李氏紱臨川志。錢氏大昕鄞志。李氏兆洛鳳臺志。並主詳贍。蓋以郡邑所施行。必徵方志。故必擇精語詳。不害有所偏廢也。平江縣志。宋寶祐元延祐明永樂舊本。

俱無存。宏治辛亥。隆慶庚午。尙有殘本。崇禎庚辰。刻本亦佚。
國朝康熙己未。稱志略。乾隆丙辰。知縣景士鳳續修。而以知縣謝
仲坑乙亥本爲較善。嘉慶丙子。重修本。則因舛謬滋訟。經大吏批
示。作爲廢書。自乾隆乙亥迄今。百二十年矣。故纂修亟焉。今蒐討
舊聞。裁酌義例。恭錄

詔諭於卷首。綴雜識於卷末。別爲總目。十有三。曰地理。曰建置。曰
賦役。曰食貨。曰學校。曰祀典。曰禮儀。曰職官。曰武備。曰選舉。曰人
物。曰五行。曰藝文。其沿革晷度。皆列表以明之。并仿康氏海武功
志例。以山川城池之屬。併入地理。官署市集之屬。併入建置。祠廟
寺觀之屬。併入祀典。以綱統目。以簡御煩。計爲類九十有五。爲卷

五十有六總四十餘萬言別爲序次如左

郡國有志猶列國之有史例皆恭錄

聖諭於簡首凡所敘述皆上對

朝廷下對天下萬世而言故大吏一律書名宋潛說友臨安志首載詔令此春秋書春王正月之義也平江乙亥志首列

皇言續志分繫各門不足以示尊敬 國家

列聖相承絲綸炳煥凡命官訓士恤民及表章節義普免天下錢漕諸

諭旨雖非一邑所專承而大經大法實足與典誥並壽至增加學額及 敕建忠義祠諸諭尤專爲平江而發故皆恭錄弁首俾讀

者生忠愛之心焉

郡縣志於目錄家屬地理地理志之本也治地理者首重輿圖其次則沿革周官土訓掌道地圖職方氏掌邦國都鄙之圖而大司徒以地圖周知九州地域廣輪之數圖之用視書尤切故地志多稱圖經一稱圖志第古法失傳晉裴秀作禹貢圖創分率準望諸法得其遺意今亦無存國初胡渭禹貢錐指顧祖禹方輿紀要其爲圖並計里開方深契古法而胡氏於虛空鳥道之說尤獨得心解今師其意畫方計里繪總圖一四鄉圖各一其歷代沿革離析合併之由則爲表以明之至星土職於保障氏凡有分土皆有分星鄭康成謂古數書久亡漢晉以來郡國入度皆後世堪輿說

耳且經星盡乎天度而中國不盡地球以地球一隅之中國配周天之經星理不可曉僧一行謂精氣相屬不繫方隅殆亦強爲調解武功志不紀星野以邑統於郡更無容贅也茲以相沿旣久約著崖略附入地理中仍照熱河志例創立晷度之目晷以測景度以測極景有長短極有高低凡縣境日出日入早晚及節氣時刻分秒皆按度里表而出之蓋自唐宋迄今而法加密矣若夫畫井分疆王者所以域民也周禮職方所掌卽地志之權輿又有山師川師及司險之官大約山國重險隘水國重津梁古今一致今志疆域並考山川方向隨其脈絡遠近而條貫之志山用山海經體志水用水經體所謂修古不忘其初也又自近歲軍興吾平設防

守界力固行省東北門戶厥績懋焉故於關隘寨堡所述尤詳舊杜注左傳酈注水經多引故城故亭以證地望卽殘壘廢冢均詳見焉蓋藉古蹟資考鏡也今亦備列所在以諗好古之士末附風俗則周官小行人適四方集禮俗爲一書所藉以驗政治之得失者也凡此各目皆併隸地理門作地理志第一

郡縣有建置其體制視古諸侯若城池社稷學校宮室庫廩之屬雖小邑儼然大侯矣春秋之例興作必書懼役民非時也自三代迄明凡有工作必以力役相徵發我朝攤丁賦於地畝宮中有事召工給傭值如平人費鉅則請帑費小則官吏捐俸或紳民醵貲成之故雖興大役而工樂趨事三農晏然不知古未有也古籍

中若三輔黃圖宮殿疏禁扁諸書實地理家紀建置所自始武功志併學校於建置謂學校特建置中大端但記興修歲月而於一切典章不暇及也今學校自爲志壇廟列入祀典門特著其切於官民日用者凡五端曰城池曰公署曰公所曰橋渡曰坊表合爲建置志第二

禹貢紀封域山川兼及九州方物五服輸納周禮九職任萬民自三農生九穀以及虞衡藪牧皆有征後世官書專紀財賦者若元康戶口簿記元和會計錄之類皆是也國朝順治十四年頒賦役全書量賦之多寡以定役之繁簡康熙五十二年詔滋生人丁永不加賦雍正初詔丁隨地徵有賦始有役乾隆二十七年

乃并停編審民尤稱便而自

聖祖迄

高宗朝普免天下錢漕十次蠲豁者不可以億計尤曠古未有之殊典也茲本平邑舊章條其子曰田畝曰科糧曰丁餉曰漕米曰解支而殿以蠲卹總爲賦役志第三

洪範八政先食貨周禮職方氏辨九州山澤之利並及男女生數鳥獸穀種則財賦物產著錄之祖也隋有諸郡土俗物產書其遺意歟史家志食貨肇自班氏晉魏隋唐以下皆因之地志家亦沿其例至積貯爲生民大命則有常平義社倉諸法凡皆本周官倉人遺人春頒秋歛之法而增損之耳楚人例食淮鹽道光中改綱

法爲票法官民稱便自粵賊踞江南借運川粵鹽賊平乃復其故而加變通焉平江食碱鹽蓋自爲一則又自軍興以來司計者仿漢唐算緡率貸宋經總制錢遺法權稅助軍需號曰釐金賴此餉軍卒夷大亂平以茶產故所權歲不下十萬緡亦當世得失之林也故條舉物產倉儲之數益以鹽法釐稅作食貨志第四

宋仁宗始詔天下郡縣皆立學至我朝而典章大備平雖叢爾邑然學校爲風教所從出正宜詳稽儀制俾學者入廟思敬以時習禮於以陶化樸僊臻明備之休自武功志隸學校於建置謝啟昆廣西通志因之且謂樂品禮節皆會典舊章率土通行非粵西獨舉之典而以舊志備載爲非體夫會典通禮豈能家有其書賴

志乘可稽藉資法守耳若略所不當略將事者於何取則焉況通志所紀何一非 朝廷大經大法豈皆粵西所獨有會典所無者乎歐陽公曰自漢以來史官所紀事物名數降登揖讓拜俯伏興之節用之郊廟朝廷自搢紳大夫從事其閒者皆莫能曉習而天下之人至於老死未嘗見也況欲識禮樂之盛曉然喻其意而被其教化以成俗乎誠至論也是用詳稽會典凡典禮位次駐幣器數樂章舞譜之屬悉綴於篇而以學額書籍教條學田及書院義學考棚附焉作學校志第五

古者封內之祭禮詳八蜡傳著四鄰其自大夫以下得祀族屬門行里社之屬 國家郵治馨香百神受職牧令爲

天子守土吏春秋歲時秩祀之禮與京師同崇德報功典至鉅也
今考論祀典自孔子廟別見學校外凡社稷壇壝及諸祠祀以次
備及若夫鄉聚叢祠浮屠老子之宮律以陸氏靈壽志之例法當
屏汰顧以民誠所寄難概從芟凡祠廟寺觀之已登舊志者仍之
續有所增亦過而存之之義也作祀典志第六

太史公作禮書班氏并爲禮樂志范蔚宗易爲禮儀志隋書因之
記曰安上治民莫善於禮孔子曰吾從周蓋時王之制尤當率履
弗越也近世朝邑武功諸志專尚簡括凡政教典禮所繫概從闕
如過於略矣伏讀 大清會典通禮通典諸書萃周官儀禮之精
損益百王之法凡以廣教化而美風俗也惜山陬下邑不能家置

一編甚有終身未獲見者不能知之烏問行之茲檢官民所通行公典及祭禮昏禮喪禮之類具著於簡俾良有司與邦之士民習乎其事而喻乎其志庶無失遵道遵路之義作禮儀志第七

周官御史掌在位名數先後之次卽漢書百官公卿表所自昉也後漢書以下皆有百官志而任是官者之名次無聞唐人廳壁記凡職官姓名占籍任年並丞尉必謹書之以掌故所繫不容略耳至正史而外州部專書紀吏績者若梁元帝丹陽尹傳唐賀氏會稽太守贊唐人成都幕府記是卽名宦志之權輿也考靈壽志例名宦卽於職官中臚列事實不立專門今於已祀名宦者特爲敘述其未入祀而政績卓卓可紀者亦附著焉又舊志未紀封建平

爲羅國豈宜數典而忘祖今徧考列史凡封爵系平者皆彙列之以冠職官之首作職官志第八

平當江鄂之衝爲行省東北門戶歷代營制設兵無多率視平爲散地自咸豐間粵寇久踞湖北之通城崇陽江西之義甯奉新而巴陵湘陰臨湘長沙皆被賊竄擾惟平屹立其中獨能固圉殺賊
欽奉

恩旨竊爲南省之冠加永遠學額三名其後湘鄉等縣請

旨加額皆援平江故事以請則團練之功也今條列營汛驛遞而於團練始末敘述尤詳宋施宿會稽志有討賊平亂二篇自後地志家多立兵事武事通紀載記諸目其例最善今別記兵事於篇

末以繼周官外史之遺作武備志第九

選舉志肇自唐書宋金元史皆因之凡天子自詔曰制科大臣薦士於朝曰薦舉隋唐以來重進士科明代增舉人一科凡正史志選舉不錄人名唐崔氏宋洪氏作登科記今皆亡佚明太學始立進士題名牌後遂輯爲題名記求其備載不遺獨賴方志而已宋馬端臨作選舉考謂後世以科目爲取士之途銓選爲舉官之途一屬禮部一屬吏部於是科目與銓選不相爲謀進身之途轍不一故立舉士舉官兩門以該之今撮記選舉制度於前而表其名次曰進士曰舉人曰貢士舉士也曰薦辟曰仕宦曰武職而附以職銜封蔭舉官也凡附著者律以史例多應從芟然考韓邦靖朝

邑志於人物門列其父紹宗兄邦奇弟邦彥科目事實并及己之仕履武功志載以例入監者二十五人掾史入官者十二人并及武功封贈彼號稱簡貴者尙爾詎不可援爲例乎作選舉志第十地志爲史氏之流別史有列傳方志亦師其意而人物具紀焉唐書藝文有江敞陳畱人物志陽休之幽州人物志若楚南文獻之見於隋書經籍志者有吳陽勝桂陽先賢畫贊晉張方楚國先賢傳贊劉或長沙耆舊傳其見於水經注者有武陵先賢傳見於遂初堂書目者有岳陽名賢傳惜皆已無徵吾平若宋十三君子受業朱子之門昌明正學乃天下之善士當於古人中尙友之者也自時厥後名人輩出流風未墜茲慎考前載嚴嚴見聞以類相次

曰儒林曰宦蹟曰文學曰忠節曰孝義曰武略曰善行曰耆壽曰
流寓而方外附焉至貞烈節孝壽婦概以列女賅之繼軌中壘用
光輝管作人物志第十一

自董氏仲舒以五行災異言春秋其後京房翼奉谷永之徒並善
言天至劉歆而益詳班氏因作五行志歷史仍之馬氏通考乃總
災祥二事而名之曰物異鄭氏通志紀災祥不紀徵應蓋其慎也
平江舊志均列災祥去之則事實無徵歸併則無門可隸考靈壽
志亦紀災祥且謂感應之理不可誣也故謹書之而用班史之目
作五行志第十二

劉略班志爲藝文著錄之始關中風俗記始以地志而兼及藝文

若專錄篇章則自楊慎全蜀藝文志始也後之作者以其非班氏法遂從目錄例止列書名撮其旨要其詩古文則用范石湖吳郡志例分附各條下不另立一門以滌冗濫法誠善矣然詩文有無類可附而實關掌故及風土利弊時事因革者必盡懸置之不可惜乎近世沅湘耆舊諸集多取資於郡縣志其明效也平之汨羅江爲左徒懷沙盡節之地流風餘韻於茲未墜惜遺文多闕軼僅存什一於千百彌覺可珍故稍變其例上卷志書目凡先正著述皆列焉仍用崇文總目及晁氏讀書志陳氏書錄解題例條紀卷數撮舉序例並仿 皇清經解例以作者先後爲序不以經史子集爲次下卷則采錄詩古文取其有關民風政理者間或以人存

詩靈壽志載陸氏所撰退思堂等記是作者所撰述並許登載其
例未嘗不寬也至金石之學鄭氏列諸通志元徐碩嘉禾志具詳
碑碣茲擇其著者附焉作藝文志第十三

自班史志藝文而小說九百本自虞初亦皆著錄後之爲目錄學
者率祖班氏錄雜家蓋雖稗官叢談有足以廣異聞昭勸戒資考
證者通儒所不廢也茲攬撫百家參以故老傳述凡無類可歸者
悉綴於篇傳曰所見異辭所聞異辭所傳聞異辭疑以存疑古之
志也故以雜志終焉

南嶽志小序

星度

星土職自保章氏有分土卽有分星然經星盡乎天度而中國不盡地球以十二國配周天之經星理不可曉地志家多疑之惟南嶽宿當軫翼度應璣衡爲衡山所自名而星經亦有玉衡主荊州之說又衡嶽舊隸長沙郡軫旁一星曰長沙主壽長子孫昌故衡山稱壽嶽然則就衡紀星實不與他地志等也抑凡晷以測景度以測極二者合符近世法益加密衡嶽爲大江以南十數行省之主山上與南極相維繫元代嘗遣官測日影於此祝融峰頂有觀曰臺焉志衡者安得遺之茲故約舉其要合之爲星度志云

圖說

地志古稱圖經。炎帝白阜圖地形。其來古矣。周官土訓掌道地圖。職方氏掌天下之圖。大司徒以地圖周知地域。廣輪之數。而晉裴秀作禹貢十八圖。創分率準望之法。至爲精核。嶽志祖述禹貢者也。故圖尤要焉。今作七十二峰圖一。嶽廟圖一。各有說以繫之。五嶽真形圖。道家所重也。今附焉。

形勝

凡志山志形勝也。嶽之勝在七十二峰。非絕人事。褻糧作數月遊。惡克窮其勝哉。登臨紀勝之詩文。凡因地而作者。悉附本條之下。俾覽者當臥遊焉。宋范成大吳郡志實開此例。其後張鳳鳴作桂

勝菴斯張作吳興備志朱彝尊作日下舊聞考皆因之提要稱其
典雅不虛也今全仿其例云

祠廟

唐虞五載一巡狩柴望秩于山川爲壇邠爲廟邠不可得而詳矣
後世禮殿廟饗而嶽廟迄未知建自何年宋開寶初始詔嶽瀆各
以縣令兼廟令然廟不始於宋蓋自秦漢以來有之矣明御史陳
祚獨疏請築壇壝立廚庫而去廟去塑像廷議不從夫非謂有其
舉之莫敢廢邠

祀典

五帝三王禮樂不相沿襲若嶽瀆祀典則上古迄今如一日也王

五嶽山傳卷三十一
制五嶽視三公謂視其牲器之數耳其時天子稱王三公降於王
一等後世天子稱皇帝則不得仍以三公視嶽矣唐宋之晉帝號
有以哉明太祖改稱南嶽衡山之神謙退不敢加號耳祝文具在
可覆按也陋儒乃謂稱帝必非所安殆膠柱而鼓瑟者歟

前獻

地志例紀人物嶽志則前獻之繫於嶽者並當列之不必土著也
舊志列勝遊王氏蓮峰志作名流皆未賅括今自上古迄昭代彙
稱前獻而其人之事蹟於嶽無關者繫不多及以所志在嶽也或
疑刪翦斷自唐虞皇古荒遠難稽未宜博引不知此用山海經例
史志非經比也且易繫辭稱包犧神農黃帝氏作曷嘗不及上世

聖人邪

仙釋

隋唐以前衡嶽羽流白日冲舉者不可勝數自思大師振錫南來懷讓石頭繼之宗風盛而道流稍替矣然洞天福地間異人蓋不少也舊志存攘斥佛老之見於二氏僅存崖略事蹟頗芟蕪之不知志山非講學也班史列神仙書十家稱其能葆性命之真范蔚宗西域傳論亦闡明佛法感驗今緇黃之棲嶽者以數千計不舉其尤彼將何所效法耶彙而列之亦各明一義而已

書院

嶽爲神皋輿區琳宮紺宇相望而石鼓與嶽麓又爲四大書院之

二吾道正自不孤也書院之目始於唐然麗正崇正皆秘閣藏書所非講肄之地自李寬居石鼓爲書院得名之始五代蔣維東隱居衡嶽受業者稱曰山長則又爲山長之權輿焉胡文定趙清獻並有書院在嶽朱張講學嶽麓尤稱極盛明之白沙念菴甘泉東廓暨祝黃門蔡白石各以書院傳是所望於能嗣音者

寺觀

天下名山多浮屠老子之宮蓋眞靈窟宅天特假方外以居守之嶽爲炎方巨鎮宮觀梵宇分布七十二峰間尤著者則爲朝廷所敕建而其盛衰興廢各有數以主之陵谷滄桑之變出世與住世其揆一也楊氏伽藍記段氏塔寺記詳哉其言之矣豈第志勝因

哉蓋亦望來者之興復云爾

古蹟

莫古於天地而闔闔莫知所自始則必於人徵之人往而蹟存則因蹟益以懷古也自有天地卽有斯嶽人之登嶽者不知紀極也而炎黃姚姒以來傑出者粲然可數今不及於古矣後之人不又且以今爲古邪要之蹟存卽人存仍問其人之自足千古否耳

物產

韓子曰五嶽於中州衡山最遠其水土之所生神氣之所感白金水銀丹砂石英鍾乳橘柚之包竹箭之美于尋之名材不能獨當也蓋重在魁奇傑特之人耳然物與人同稟地氣卽論物產抑豈

非精英所發露。邪特韞玉懷珠。非庸耳俗目所能及耳。不然商嶺之芝。青城之杞。勾漏之丹砂。孰非喬嶽所包孕哉。

金石

昔田概撰京兆金石錄。劉涇撰成都刻石總目。各以其方繫焉。朱長文吳郡續志。別立碑碣門。徐碩嘉禾志。因之。則金石入地志之始也。古莫古於禹碑。舉禹碑則商彝周鼎。秦碣漢篆。皆不足云矣。或以贗鼎疑之。不知諸家釋文。誠不免竊鑿附會。碑則未容輕議也。自茲以降。吉金貞石。代有鴻文。固當與靈嶽並壽哉。

藝文

地志錄詩文。多似選本。非法也。其按代而復分體者。尤繁碎。今用

范石湖志吳郡例凡詩若文之紀名勝者各附本條下而藝文志則專紀書目且必其實有關於獄者始列之其或書軼不傳而序例尙可考見亦在所不遺蓋自上古迄今故籍之可考者略盡於此文獻不足徵可勝歎哉

雜識

曲臺五十有九篇內有雜記地志家宗之雜記者網羅軼事以廣異聞備掌故非僅齊諧諸舉比也靈嶽深廣自邃古以來傳聞異辭者何可億計茲之摭異蒐奇特存什一於千百耳譬諸五雜俎藉侑侯鯖亦知味者所不廢也